

新刊王氏脉經

三



新刊王氏脉經卷第七



朝散奉光祿卿直秘閣判登聞檢院上護軍臣林億等類次

病不可發汗證第一

病可發汗證第二

病發汗以後證第三

病不可吐證第四

病可吐證第五

病不可下證第六

病可下證第七

病發汗吐下以後證第八

病可溫證第九



病不可灸證第十

病可灸證第十一

病不可刺證第十二

病可刺證第十三

病不可水證第十四

病可水證第十五

病不可火證第十六

病可火證第十七

熱病陰陽交并少陰厥逆陰陽竭盡生死證第十八

重實重虛陰陽相附生死證第十九

熱病生死期日證第二十

熱病十逆死日證第二十一

熱病五藏氣絕死日證第二十二

熱病至脉死日證第二十三

熱病損脉死日證第二十四

病不可發汗證第一

少陰病脉細沈數病爲在裏不可發其汗

脉浮而緊法當身體疼痛當以汗解假令尺中脉遲者不可發其汗何以知然此爲榮氣不足血微少故也

少陰病脉微

一作濡而微弱

不可發其汗無陽故也

脉濡而弱弱反在關濡反在顛微反在上澀反在下微則陽氣不足澀則無血陽氣反微中風汗出而反躁煩澀則無血厥而且寒陽微發汗躁不得眠

動氣在右不可發汗發汗則衄而渴心苦煩飲即吐水

動氣在左不可發汗發汗則頭眩汗不止筋惕肉瞤

動氣在上不可發汗發汗則氣上衝正在心端

動氣在下不可發汗發汗則無汗心中大煩骨節苦疼目運

惡寒食即反吐穀不得前一二云穀不消化

咽中閉塞不可發汗發汗則吐血氣微絕手足逆冷欲得蹠

卧不能自溫

諸脉數動微弱並不可發汗發汗則大便難腹中乾一二云小便難胞

中乾胃燥而煩其形相象根本異源

脉濡而弱弱反在關濡反在顛弦反在上微反在下弦為陽

運微為陰寒上實下虛欲得溫微弦為虛不可發汗發汗

則寒慄不能自還欲者則劇數吐涎沫咽中必乾小便不利

心中飢煩躁時而發其形似瘧有寒無熱虛而寒慄欬而發

汗蹇而苦滿

滿一作心痛

腹中復堅

厥不可發汗發汗則聲亂咽嘶舌萎穀不得前

諸逆發汗微者難愈劇者言亂睛眩者死命將難全太陽病得之八九日如瘧狀發熱而惡寒熱多寒少其人不嘔清便續自可一日再三發其脈微而惡寒此為陰陽俱虛不可復發汗也

太陽病發熱惡寒熱多寒少脈微弱則無陽也不可復發其汗咽乾燥者不可發汗

亡血家不可攻其表汗出則寒慄而振

衄家不可攻其表汗出必額陷脈上促急而緊直視而不能

眴不得眠

汗家重發其汗必恍惚心亂小便已陰痿可與禹餘糧圓

淋家不可發汗發其汗必便血

瘡家雖身疼痛不可攻其表汗出則痊

一作瘡下同

冬時發其汗必吐利口中爛生瘡

下利清穀不可攻其表汗出必脹滿

欬而小便利若失小便不可攻其表汗出則厥逆冷汗出多極發其汗亦堅

傷寒一二日至四五日厥者必發熱前厥者後必熱厥深者熱亦深厥微者熱亦微厥應下之而反發其汗必口傷爛赤病人脉數數為有熱當消穀引食反吐者醫發其汗陽微膈氣虛脉則為數數為客陽不能消穀胃中虛冷故令吐也傷寒四五日其脉沈煩而喘滿脉沈者病為在裏反發其汗津液越出大便為難表虛裏實又則謔語

傷寒頭痛翕翕發熱形象中風常微汗出又自嘔者下之益煩心懊憹如飢發汗則致瘥身強難以屈伸熏之則發黃不得小便久則發欬唾

太陽病發其汗因致瘥

傷寒脈弦細頭痛而反發熱此屬少陽少陽不可發其汗

太陽與少陽併病頭項強痛或眩冒時如結胸心下痞堅者不可發其汗

少陰病欬而下利譫語者此被火氣劫故也小便必難以強責少陰汗也

少陰病但厥無汗而強發之必動其血未知從何道出或從

口鼻或從目出

一作耳

者是爲下厥上竭爲難治

傷寒有五皆熱病之類也同病異名同脈異經病雖俱傷於

風其人自有痼疾則不得同法其人素傷於風因復傷於熱風熱相薄則發風溫四肢不收頭痛身熱常汗出不解治在少陰厥陰不可發汗汗出譫言獨語內煩躁擾不得卧善驚目亂無精治之復發其汗如此者醫殺之也

傷寒濕溫其人常傷於濕因而中暍濕熱相薄則發濕溫病苦兩脛逆冷腹滿又皆頭目痛苦妄言治在足太陰不可發汗汗出必不能言耳聾不知痛所在身黃面色變名曰重暍如此者死醫殺之也

右二首
出醫律

病可發汗證第二

大法春夏宜發汗

凡發汗欲令手足皆周至熱熱一時間益佳但不欲如水流離若病不解當重發汗汗多則亡陽陽虛不得重發汗也

凡服湯藥發汗中病便止不必盡劑也

凡云可發汗而無湯者圓散亦可用要以汗出為解然不如湯隨證良

太陽病外證未解其脈浮弱當以汗解宜桂枝湯

太陽病脈浮而數者可發其汗屬桂枝湯證

陽明病脈遲汗出多微惡寒表為未解可發其汗屬桂枝湯
夫病脈浮大問病者言但堅耳設利者為虛大逆緊為實汗
出而解何以故脈浮當以汗解

傷寒其脈不弦緊而弱弱者必渴被火必譫語弱者發熱脈
浮解之當汗出愈

病者煩熱汗出即解復如瘧狀日晡所發熱此屬陽明脈浮
虛者當發其汗屬桂枝湯證

病常自汗出此爲榮氣和榮氣和而外不解此衛不和也榮行脉中爲陰主內衛行脉外爲陽主外復發其汗衛和則愈屬桂枝湯證

病人藏無他病時發熱自汗出而不愈此衛氣不和也先其時發汗即愈屬桂枝湯證

脉浮而緊浮則爲風緊則爲寒風則傷衛寒則傷榮榮衛俱病骨節煩疼可發其汗宜麻黃湯

太陽病不解熱結膀胱其人如強直必自下下者即愈其外未解者尚未可攻當先解其外屬桂枝湯證

太陽病下之微喘者表未解故也屬桂枝加厚朴杏子湯證傷寒脉浮緊不發其汗因衄屬麻黃湯證

陽明病脉浮無汗其人必喘發其汗則愈屬麻黃湯證



太陰病脉浮者可發其汗属桂枝湯證

太陽病脉浮緊無汗而發熱其身疼痛八九日不解表候續
在此當發其汗服湯微除發煩目瞑劇者必衄衄乃解所以
然者陽氣重故也属麻黃湯證

脉浮者病在表可發其汗属桂枝湯證

一云麻黃湯

傷寒不大便六七日頭痛有熱與承氣湯其大便反青一作小便

清者此為不在裏故在表也當發其汗頭痛者必衄属桂枝湯證

下利後身體疼痛清便自調急當救表宜桂枝湯

太陽病頭痛發熱汗出惡風若惡寒属桂枝湯證

太陽中風陽浮而陰濡弱浮者熱自發濡弱者汗自出當發

惡寒淅淅惡風翕翕發熱暈鳴乾嘔属桂枝湯證

太陽病發熱汗出此為榮弱衛強故使汗出欲救邪風属桂

枝湯證

太陽病下之氣上衝可與桂枝湯不衝不可與之

太陽病初服桂枝湯而反煩不解者法當先刺風池風府却與桂枝湯則愈

燒針令其汗針處被寒核起而赤者必發背脈氣從少腹上衝心者灸其核上一壯與桂枝加桂湯

太陽病項背強几几反汗出惡風屬桂枝加葛根湯

太陽病項背強几几無汗惡風屬葛根湯

太陽與陽明合病而自利不嘔者屬葛根湯證

太陽與陽明合病不下利但嘔屬葛根加半夏湯

太陽病桂枝證醫反下之遂利不止其脈促者表未解喘而汗出屬葛根黃芩黃連湯

太陽病頭痛發熱身體疼腰痛骨節疼痛惡風無汗而喘屬
麻黃湯證

太陽與陽明合病喘而實瀉不可下也屬麻黃湯證

太陽中風脈浮緊發熱惡寒身體疼痛不汗出而煩躁頭痛
屬大青龍湯脈微弱汗出惡風不可服之服之則厥筋惕肉
瞤此爲逆也

傷寒脈浮緩其身不疼但重下有輕時無少陰證者大青龍
湯發之

傷寒表不解心下有水氣乾嘔發熱而欬或渴或利或噎或
小便不利小腹滿或微喘屬小青龍湯

傷寒心下有水氣欬而微喘發熱不渴服湯已而渴者此寒
去欲爲解屬小青龍湯證

陽明中風脈弦浮大而短氣腹都滿脇下及心痛久按之氣

不通

一作按

鼻乾不得汗嗜卧一身及目悉黃小便難有潮

熱時時噦耳前後腫刺之小差外不解病過十日脈續浮與

小柴胡湯但浮無餘證與麻黃湯不溺腹滿加噦不治

太陽病十日以去脈浮細嗜卧此爲外解設脅滿脇痛與小

柴胡湯脈浮者屬麻黃湯證

中風往來寒熱傷寒五六日以後脅脇苦滿嘿嘿不欲飲食

煩心喜嘔或脅中煩而不嘔或渴或腹中痛或脇下痞堅或

心中悸小便不利或不渴外有微熱或欬者屬小柴胡湯

傷寒四五日身體熱惡風頸項強脇下滿手足溫而渴屬小

柴胡湯證

傷寒六七日發熱微惡寒支節煩疼微嘔心下支結外證未

去者屬柴胡桂枝湯

少陰病得之二三日麻黃附子甘草湯微發汗以二三日無證故微發汗也

脈浮小便不利微熱消渴與五苓散利小便發汗

病發汗以後證第三

二陽併病太陽初得病時發其汗汗先出復不徹因轉屬陽明續自微汗出不惡寒若太陽證不罷不可下下之爲逆如此者可小發其汗設面色緣緣正赤者陽氣怫鬱在表當解之熏之若發汗不大徹不足言陽氣怫鬱不得越當汗而不汗其人躁煩不知痛處乍在腹中乍在四肢按之不可得其人短氣但坐汗出而不徹故也更發其汗即愈何以知其汗不徹脈澀故以知之

未持脉時病人以手自冒之師因教試令欬而不即欬者此必兩耳無所聞也所以然者重發其汗虛故也

發汗後飲水多者必喘以水灌之亦喘

發汗後水藥不得入口爲逆若更發其汗必吐下不止

陽明病本自汗出醫復重發其汗病已差其人微煩不了了此大便堅也以亡津液胃中乾燥故令其堅當問小便日幾行若本日三四行今日再行者必知大便不久出今爲小便數少津液當還入胃中故知必當大便也

發汗多又復發其汗此爲亡陽若譫語脉短者死脉自和者不死

傷寒發其汗身自爲黃所以然者寒濕相搏在裏不解故也病人有寒復發其汗胃中冷必吐衄

